

05/09/2001

Nur Herman bawa bendera

NUR Herman Majid (gambar) terharu dipilih untuk membawa pembawa Jalur Gemilang untuk kontinjen Malaysia di Sukan Sea XXI Kuala Lumpur.

"Ini penghormatan tertinggi negara kepada saya. Saya akan memikul amanah membawa Jalur Gemilang dengan ikhlas," kata jaguh 110 meter lari berpagar itu.

"Saya tidak sesekali akan mempersia-siakan penghormatan dan kepercayaan yang diberikan negara kepada saya," kata Herman, 29, selepas menerima Jalur Gemilang daripada Perdana Menteri Datuk Seri Dr Mahathir Mohamad di Putrajaya, semalam.

Herman dipilih mengetuai kontinjen negara membawa Jalur Gemilang ketika perbarisan upacara pembukaan rasmi Sabtu ini berdasarkan rekod gemilangnya dalam Sukan Sea.

Herman memenangi lima emas 110m berpagar berturut-turut sejak Sukan Sea 1991 di Manila dan di Kuala Lumpur kali ini mencari emas keenamnya.

"Bagi saya membawa Jalur Gemilang ini bukan satu bebanan sebaliknya satu penghormatan. Saya tidak anggap ia menyeksakan ataupun boleh menggugat prestasi saya.

"Sebaliknya ia satu pembakar semangat kepada diri saya. Saya pembawa Jalur Gemilang saya perlu memberikan contoh terbaik termasuk persembahan gemilang di Sukan Sea XXI nanti," katanya.

Herman akan berdepan saingan sengit daripada dua pelari Thailand dalam usahanya cuba meneruskan penguasaannya dalam 110 meter di Sukan Sea.

Sementara itu, atlet veteran lompat kijang, Zaki Sadri berkata penghormatan sebagai pembawa Jalur Gemilang perlu dihargai dengan baik.

"Ia satu penghormatan kepada setiap atlet apabila dipilih sebagai pembawa Jalur Gemilang dalam mana-mana sukan bertemasya. Saya pernah dipilih sebagai pembawa Jalur Gemilang ketika Sukan Komanwel 1998," katanya.

Mengenai amanat Perdana Menteri, Zaki, yang berkata semua atlet harus menghayati dengan baik dan menunaikan segala permintaan Datuk Seri Dr Mahathir Mohamad.

"Atlet harus menyematkan amanat Perdana Menteri. Mereka perlu menghayatinya dan menunaikan segala nasihat dan permintaannya. Kita tidak boleh leka dalam menghadapi temasya ini," katanya.

(END)